

Candela feros a destrui varios negoshi den caya grandi



ORANJESTAD -- Ayera anochi pa basta oranan largo, miembronan di Bombero a lucha contra e vlamnan feros cu a destrui varios negoshi den caya grandi. Awe gran parti di caya grandi lo ta sera pa motibo di e candela aki. Awe e tienda di pueblo La Linda no tei mas. Lesa pagina dos pa un relato amplio.



Tin indicacion cu tur cos a cuminsa na La Linda

Candela feros a destrui varios negoshi den caya grandi

ORANJESTAD — Ayera anochi henter comunidad a keda conmovi ora a tende cu La Linda y varios negoshi banda di dje a kima.

La Linda den caya grandi, cu ta ser considera e tienda di pueblo, awe no tei mas. Bomberonan cu a presenta na e sitio den careda di 8'or, a mira huma ta sali for di parti patras di La Linda. Inmediatamente a bati alarma.

CANDELA GRANDI

No a dura mucho cu por a mira vlamnan masha grandi cu a destrosa no solamente La Linda sino e negoshinan banda di dje esta Arco Iris, Shalimar Palace, Victoria Fashion, Coral Gift Shop y Weitnauer. Tabatin momento cu un parti di muraya di La Linda a basha abou.

EVACUA

Mirando e cayente y huma cu e candela feros tabata produci, Polis a bay na e edificio den Hendrikstraat caminda tin algun apartamento y a conseha e habitantenan pa sali.

MIRONES

Polis tabata man na cabes cu e cantidad di mirones cu tabata busca tur manera pa burla Polis pa bay mira e candela. Ta practicamente tur caminda cu ta conduci pa caya grandi.

CANDELA NA BATA

Na dado momento e chispanan cu e candela feros a produci a cay riba Bata y e borch di plastic a pega candela. Inmediatamente Bombero a logra paga esaki.

ARUBA BANK

Tabata teme cu Aruba Bank cu ta hopi pega cu La Linda lo pegacandela. Afortunadamente door di e biento stabil esaki no a sosode. Director di Aruba Bank a pidi asistencia di su personal pa asina a saca tur e computernan y discnan cu informacionnan valioso y hiba esakinan na un lugar sigur.

PROBLEMA DI AWA

Hopi a cuestiona e forma con Bombero a atende e candela feros ayera nochi. Notabel tabata cu Bombero tabata confronta hopi problema cu awa. A instala un pomp y via di

Fort Zoutman a core slangnan pa lama pa asina haya awa pa domina e candela.

AMBULANCE

Miembronan di Cruz Cora y Ambulance tabata presente pa duna asistencia na esnan cu lo a haya molester di huma. Tabatin dos miembro di Bombero cu a haya problema di respiracion y el a wordo hiba hospital.

AYUDO DI VALERO

Na dado momento e unidadnan di Valero a yega Playa y a duna un man. E bomberonan tabata hopi cansa ya cu ta trata aki di un

candela hopi grandi. Bomberos a haci uso di 6 auto, e hoogwerper y un pomp, mientras cu a haya asistencia di Valero cu algun unidad.

Awe mainta sigur lo bay tin hopi movencion den caya grandi. E lo ta un bista tristo ya cu hopi hende ta corda La Linda cu awe no tey mas.

Ademasta un cantidad di hende a keda afecta pa e candela feros aki. Investigacion lo mester muestra unda e candela aki a origina y kico tabata e origen.



Casi henter cuerpo bombero a lucha pa combati candela feros den caya grandi

ORANJESTAD -- Un total di 6 unidad di Bombero, un pomp pa chupa awa di laman, diferente unidad di Valero y practicamente henter e cuerpo di Bombero a lucha contra e candela feros den caya grandi cu a destrui varios negoshi. Ariba combinacion di e fotonan por mira e situacion cu tabata reina ayera nochi den Playa.

